



LISTOVI GRAČANIČKOG KALENDARA OD 29. 10. 2003. DO 30. 4. 2004.

29. 10. 2003.

NASTAVLJA SE REGULACIJA SOKOLUŠE

U prisustvu predstavnika investitora JP za "Vodno područje slivovi rijeke Save" i Direkcije voda Tuzla, korisnika Općine Gračanića i izvođača radova, Rudnik željezne rude Vareš predao je dio završenih radova na regulaciji korita rijeke Sokoluše - dionice most "Skver" - most "Rampa", u dužini od 217 metara. Ukupna vrijednost izvršenih radova iznosi 315.738,69 KM. Dogovoreno da se angažuje isti izvođač na preostalom dijelu navedene dionice, u dužini od 40 metara

31. 10. 2003.

37. REDOVNA SJEDNICA OPĆINSKOG VIJEĆA: PREDNACRT PLANA BUDŽETA ZA 2004.

Planira se ostvarenje prihoda u iznosu od 5.944.000 KM, sa projektovanim rastom za oko 20% u odnosu na predviđeno ostvarenje u 2003. Rashodi su ostali na nivou planiranog ostvarenja iz 2003. godine, što je i jedna od smjernica aktuelne fiskalne politike.

21. 11. 2003.

ŠEZDESETGODIŠNJICA ZAVNOBIHA

U povodu 60. godišnjice ZAVNOBIHA, predavanje prof. dr. Omera Ibrahimagića "Bosanska državnost i nacionalnost" U okviru Tribine predstavljena je i istoimena knjiga prof. Ibrahimagića i 16. broj Časopisa "Gračanički glasnik", koji je takođe posvećen jubileju ZAVNOBIHA.

21. 11. 2003.

SAVJETOVANJE O MUSLIMANSKIM FORMACIJAMA KROZ HISTORIJU

U organizaciji Udruženja "Patriotska liga" u Gačanici je organizovano savjetovanje o

**LISTAO:
OMER HAMZIĆ**

muslimanskim formacijama kroz historiju na kojem su uzeli učešća istaknuti historičari i naučnici drugih profila iz Tuzle, Sarajeva i Gračanice.

24. 11. 2003.

**MJESNA ZAJEDNICA GRAČANICA
– 40 GODINA POSTOJANJA I RADA,
PRIZNANJA ZASLUŽNIM POJEDINCIMA,
ORGANIZACIJAMA I USTANOVAMA**

Ovaj značajan jubilej obilježen je prigodnom akademijom i kulturno-umjetničkim programom. Prigodan referat pročitao je predsjednik Vijeća mjesne zajednice Aziz Bričić, potom je pročitana odluka o dodjeli posebnih priznanja Mjesne zajednice, koja su dodijeljena dan kasnije na prigodnom susretu starih i novih aktivista te mjesne zajednice. Povelju kao posebno priznanje dobili su: *a) pojedinci:* Ćamil Naimkadić, Jusuf Kadić, Osman Hadžić, Hajrudin Junuzović, Sead Čaušević, Muharem Salihbašić, Nusret Helić, Ahmet Iljazović, Mehmed Tuholjak, Ahmet Devedžić, Omer Hamzić, Dušan Božić, Alija Mostarlić, Amira Bravić, Tomislav Toman, Dino Čolić, Mahmut Gazibegović, Aziz Bričić, Kadir Mehanović, Muhidin Halilović, Ratko Todorović, Sulejman Devedžić, Sabina Hasić, Salko Hodo, Jusuf Salihefendić, Halid Hadžihasanović, Ejub Hodžić, Fahrija Širbegović i Osman Brkičević; *b) organizacije, preduzeća i udruženja:* Gimnazija "Dr. Mustafa Kamarić", Mješovita srednja škola, Osnovna škola "Hasan Kikić", Druga osnovna škola, Osnovna muzička škola, Bosanski kulturni centar, Dom zdravlja, Ratna bolnica, Opća bolnica "Dr. Mustafa Beganović", Dobrovoljno vatrogasno društvo, Kulturno-umjetničko društvo "Adem Alić", Rukometni klub "Gračanica", Fudbalski klub "Bratstvo", "Gračanički glasnik", "Fortuna", "Olimp", "Fering", "Jadrina", "Kokaprodukt", "Bosna", "Vodovod i kanalizacija", "Komus", "Grin", "Grafopak", Elektrodistribucija Gračanica i Kompanija "Širbegović.

1. 12. 2003.

**38. REDOVNA SJEDNICA OPĆINSKOG VIJEĆA:
USVOJEN PROSTORNI PLAN OPĆINE**

Većinom glasova vijećnici su usvojili Prostorni plan općine Gračanica i Odluku o provođenju Prostornog plana Općine Gračanica. To su temeljni dokumenti budućeg prostornog planiranja na području općine Gračanica, o kojima su nadležne službe vodile višemjesečnu javnu raspravu. Riječ je o prvom zvanično usvojenom dokumentu o uređenju prostora cijele općine. Da podsjetimo: Prostorni plan općine, koji je urađen 1985. godine, nikada nije bio i zvanično usvojen.

14. 12. 2003.

**AMEL ĆURIĆ IZ GRAČANICE: METEORSKI
USPJEH, OTVOREN PUT KA ZVIJEZDAMA, DO
SADA NAJBOLJE PLASIRANI GRAČANLIJA
U MEDIJSKOM PROSTORU BOSNE I
HERCEGOVINE**

To je postigao zahvaljujući pobjedni na popularnom takmičenju OBN TV "OBN Super Nova Music Talents", svojoj upornosti i nesumnjivom talentu. Gračanica ga je dočekala na nogama kao i sve svoje dosadašnje šampione.

20. 12. 2003.

**U LUKAVICI – 900 METARA ASFALTA KROZ
DELIĆE**

Riječ je o malom poduhvatu u tom udaljenom selu gračaničke općine. Mještani su sakupili 45.000 KM, općina isto toliko - po principu "pola-pola". Posao se nastavlja, ostalo je da se asfaltira još 600 metara na toj dionici puta...

23. 12. 2003.

**OPĆINSKI NAČELNIK NUSRET HELIĆ
PROGLAŠEN ZA "PRIVREDNU LIČNOST BIH
2003."**

Riječ je o priznanju u konkurenciji općinskih načelnika koje mu je dodijelila Poslovna konferencija o BiH biznisu za podsticaj biznisa u 2003. godini.

29. 12. 2003.

39. REDOVNA SJEDNICA OPĆINSKOG VIJEĆA GRAČANICA, USVOJEN PLAN BUDŽETA ZA 2004., POZITIVNA OCJENA NAČELNIKA ZA 2003.

Ukupni prihodi planirani su u iznosu od 6.579.000 KM, od čega su porezni prihodi 3.327.000 KM, neporezni 2.150.000 KM i tekuće potpore 1.102.000 KM. U poređenju sa 2003. godinom, porezni prihodi su, zbog smanjenja poreza na dobit od poljoprivredne djelatnosti, smanjeni za 236.000 KM, a neporezni povećani za 262.000 KM. Značajnije su povećani i prihodi od imovine, komunalnih taksi i drugih naknada. Tekuće potpore su planirane u iznosu od 773.000 KM, a odnose se na sredstva koja će građani obezbijediti po mjesnim zajednicama. Rashodi su planirani u iznosu od 6.109.000 KM i manji su od ukupnih prihoda za 470.000 KM. Razlika će se koristiti za otplatu kredita, isplatu jedne plaće zaposlenim radnicima u općinskim organima uprave, te isplatu još nekih zaostalih obaveza.

Uz pozitivnu ocjenu rada općinskog načelnika Nusreta Helića u 2003. godini, vijećnici su posebno istakli njegovo angažovanje u oblasti lokalnog ekonomskog razvoja, na unaprijeđenju i racionalizaciji općinske uprave, podršci ulaganjima u infrastrukturu po mjesnim zajednicama itd. U realizaciji svojih programskih ciljeva, načelnik je podržavao građansku inicijativu i ostvario maksimalnu transparentnost u svom radu.

10. 1. 2004.

U GRAČANICI OTVORENA LIKOVNA GALERIJA "BELINI"

U likovno i arhitektonski zanimljivom ambijentu Osman-kaperanove medrese, Galeriju je otvorio akademski slikar iz Gračanice Nijaz Omerović. Galerija će, kako je obećao Omerović, znatno obogatiti ne samo likovni život u Gračanici, nego će se pojavljivati i kao kreator, organizator ili učesnik u drugim kulturnim programima i sadržajima.

12. 1. 2004.

ZEMLJORADNIČKA ZADRUGA "GRAČANKA U PROŠLOJ GODINI OTKUPILA OKO 700000 LITARA MLIJEKA

Tako se najstarija zadružna organizacija na području Gračanice potvrđuje kao nosilac razvoja takozvane male poljoprivrede i okupljanja sitnih malih proizvođača u oblasti poljoprivrede. Plan za ovu godinu je milion litara mlijeka.

27. 1. 2004.

OPĆINSKI NAČELNIK UPUTIO JAVNI POZIV ZA DOSTAVLJANJE PONUDA IZ OBLASTI KULTURNO-UMJETNIČKOG STVARALAŠTVA NA PODRUČJU OPĆINE GRAČANICA ZA 2004. GODINU

Predmet ponude bili su kulturno-umjetnički programi i njihova realizacija na području općine Gračanica u 2004. godini i to: A. Kulturne i javne manifestacije od općinskog značaja: 1. Iz općinskog kalendara obilježavanja značajnih datuma (7. april, Dan oslobođenja Gračanice od fašizma u Drugom svjetskom ratu; 25. maj, Dan odbrane Gračanice; 2. jun, Dan Općine Gračanica i 8. avgust, obilježavanje godišnjice bitke na Visu; 2. Kulturna manifestacija "Ljetne večeri pod lipama Gračanice" (od 1. 7. – 31. 8. 2004. – minimalno 3 programa sedmično); B. Ostali kulturni sadržaji i manifestacije: (Obilježavanje značajnih godišnjica i jubileja, po prijedlogu ponuđača, programi za omladinu i građanstvo koji se realizuju tokom godine, kulturno-umjetnički amaterizam, muzičko stvaralaštvo, likovna umjetnost, dramska umjetnost, kulturna baština, književnost, izdavaštvo.

Pravo učešća po ovom javnom pozivu imali su subjekti s područja općine Gračanica: 1. Pravna lica registrovana za obavljanje djelatnosti iz predmeta ponude (javne ustanove, dionička društva, agencije); 2. Udruženja građana (kulturno-umjetnička društva, umjetnička udruženja, vjerske i kulturne organizacije i zajednice; 3. Umjetničke grupe i ansamblji;

4. grupe građana koji su se udružili oko određenog programa i projekta, 5. pojedinci (kao fizička lica).

Kao odlučujući kriteriji za izbor najpovoljnijih ponuda, u pozivu je navedeno sljedeće: 1. kvalitet programa (estetsko-umjetnički nivo), 2. usaglašenost sa ustanovljenim standardima manifestacija iz Kalendara obilježavanja značajnih datuma na općini (Sl. glasnik Općine Gračanica, br. 4/01) i Idejnim projektom Manifestacije "Ljetne večeri pod lipama Gračanice", 3. referens lista ponuđača i učesnika u programu, 4. Kontinuitet rada i dosadašnji rezultati na području djelovanja, 5. Cijena i način plaćanja, 6. Rokovi do završne generalne probe za konačno prihvatanje programa i odobravanje njegove realizacije (za scenske programe).

Ovakav način planiranja i izbora kulturnih sadržaja koji se finansiraju iz općinske kase, po ocjeni nadležnih organa trebalo bi da znatno popravi kvalitet i sadržaj takozvane kulturne ponude na nivou općine tokom jedne budžetske godine.

30. 1. 2004.

40. REDOVNA SJEDNICA OPĆINSKOG VIJEĆA GRAČANICA, ODLUKA O IZMJENI URBANISTIČKOG PLANA GRAČANICE, BOSANSKI KULTURNI CENTAR DOBIO POZITIVNU OCJENU ZA RAD U 2003.

...a podržana je i Programska koncepcija i šema Radio Gračanice za 2004. godinu. Vijeće je, između ostalog, usvojilo Izvještaj o radu Opštinsko štaba civilne zaštite za 2003. godinu i informacije: o sigurnosnoj situaciji na općini Gračanica za 2003. godinu, o vršenju inspekcijaskog nadzora u oblasti komunalne, urbanističko-građevinske, sanitarne, veterinarske, tržišne i turističko-ugostiteljske inspekcije na općini Gračanica u periodu januar – decembar 2003. godine, o efektima priva-



Malonogometni klub "Kaskada" Gračanica

tizacije preduzeća na području općine Gračanica sa stanjem da dan 31. 12. 2003. godine i o stanju u oblasti sporta na općini Gračanica.

6. 2. 2004.

IZBOR NAJBOLJIH SPORTISTA U 2003.

Ove godine za najboljeg u kategoriji pionira proglašen je Amel Harčin (Šah Klub Gračanica), u kategoriji pionirki Selma Kovačević (Košarkaški klub "Dado Alić" Miričina), najbolji u kategoriji kadeta, po ocjeni žirija bio je Haris Mujačić (Šah klub Gračanica), za najboljeg sportistu proglašen je Muamer Oručević (Malonogometni klub "Kaskada"), a za najbolju sportistkinju Alisa Sarajlić (Košarkaški klub Gračanica Nesam). Među sportskim radnicima naslov najboljeg ponio je Nedim Musić (Rukometni klub Gračanica), među trenerima Ferid Imamović (Nogometni klub Mladost Malešići), naslov najboljeg fer-plej sportaša ponio je Jasmin Zahirović (Nogometni klub Orahovica). Od sportskih klubova u muškoj konkurenciji, za najboljeg je proglašen Malonogometni klub "Kaskada", a u ženskoj konkurenciji Ženski odbojkaški klub Gračanica. Specijalna priznanja dobili su Fikret Konjić (Gračanica), Sead Kadić (Pribava), Vahid Bajrić (Orahovica), Vehid Brkić (Stjepan Polje) i Muhidin Mujačić (Gračanica). Zahvalnice za učešće u reprezentativnom predstavljanju Bosne i Hercegovine dobili su:

Jasmin Mrkonja, Ferid Dizdarević, Mirza Čehajić i Edib Hodžić.

19. 2. 2004.

NIZAMA SALIHEFENDIĆ, PRVI DOKTOR URGENTNE MEDICINE

Odbranila je disertaciju na Medicinskom fakultetu u Tuzli. Disertacija nosi naziv "Urgentna ultra sonografija u menadžmentu akutnog abdominalnog bola."

26. 2. 2004.

ZAVRŠENA REORGANIZACIJA OPĆINSKOG SUDA U GRAČANICI

Od 8 sudija, koliko ih je do sada radilo u ovom sudu, Visoko sudsko-tužiteljsko vijeće Federacije BiH imenovalo je troje dosadašnjih sudija i jednu sutkinju iz Doboja u sastav četvoročlanog sudijskog tima koji će u narednom periodu dijeliti pravdu u Gračanici. Davanjem svečane izjave "u posao su uvedeni": Ahmed Hamidović, Omer Šerbečić, Reuf Džinić i Nada Arsenić iz Doboja. Drastičnim smanjivanjem broja sudija okončana je procedura reorganizacije gračaničkog suda, koja se, inače, vrši u čitavoj Bosni i Hercegovini. Vrijeme i praksa će pokazati, kako je izjavio novi/stari predsjednik Suda Ahmed

Hamidović, da li će se s pola manje sudija moći održati dosadašnji visok renome ovdašnjeg suda.

2. 3. 2004.

41. SJEDNICA OPĆINSKOG VIJEĆA GRAČANICA, ODLUKA O IZVRŠENJU BUDŽETA OPĆINE GRAČANICA ZA 2003. GODINU, PODRŽAN PROGRAM RADA OPĆINSKOG NAČELNIKA ZA 2004.

Ukupno ostvareni prihodi u 2003. godini iznose 5.132.884 KM, što je za 13 % više u odnosu na prethodnu godinu. Najveći su porezni prihodi u iznosu od 3.045.015 KM ili 52,32 %, neporezni prihodi iznose 1.602.377 KM ili 31,22 % i tekuće potpore 485.492 KM ili 9,46 %. Ukupni izdaci za 2003. godinu iznose 5.531.068 KM, što je za 21,84 % više u odnosu na prethodnu godinu i veći su od prihoda za 398.184 KM ili 8,49%. Gotovo sav višak rashoda je na takozvanim kapitalnim projektima i infrastrukturi u mjesnim zajednicama. Do prekoračenja je došlo zbog neizvršavanja obaveza Direkcije za puteve o učešću 20 % za infrastrukturu, što iznosi oko 200.000 KM, što je značajna suma na koju se ozbiljno računalo.

Zbog neizvršavanja obaveza Direkcije za puteve, Općinsko vijeće je moralo donijeti Odluku da će graditi puteve po principu 50% Općina, 50 % građani. Bio je to podsticaj mjesnim zajednicama Soko, Gornja Orahovica, Lukavica pa i Gračanica, koje su skupile čak više sredstava nego što je bilo planirano budžetom. Nastali deficit u budžetu bit će pokriven viškom prihoda iz ranijeg perioda i iz planiranog suficita u 2004. godini.



Sudije općinskog suda u Gračanici: Ahmed Hamidović, Omer Šerbečić, Reuf Džinić i Nada Arsenić (s lijeva na desno)

Program rada Općinskog načelnika za 2004. godinu sastoji se iz šest strateških pravaca: stalno unapređenje poslovnog okruženja, ustrojavanje općinske administracije po mjeri građana i evropskim standardima, pružanje podrške javnom sektoru, kapitalni projekti i ulaganja, podrška mladima i jačanje građanske inicijative i transparentnosti u radu. Za kapitalne projekte u 2004. godini uložice se preko 3.000.000 KM sredstava Općine, građana i sredstava iz drugih izvora.

5. 3. 2004.

HADŽIJINA VODA NAPAJA RITAŠIĆE

Nakon više od 30 godina, ova gračanička mahala neće više imati problema sa vodosnabdijevanjem. Mjesna zajednica Gračanica i gračanički "Vodovod" zajednički su uložili 100.000 KM i to izvoriste konačno stavili u funkciju. Porodica Mehurići darovala je zemljište za izgradnju rezervoara i uređenje tog izvorišta.

31. 3. 2004.

42. SJEDNICA OPĆINSKOG VIJEĆA GRAČANICA, USVOJEN URBANISTIČKI PLAN GRAČANICE, INFORMACIJA O KULTURNO- HISTORIJSKIM SPOMENICIMA, O RADU BIROA ZA ZAPOSŁJAVANJE...

Prostorni plan općine Gračanica evidentirao je ukupno 51 nepokretni spomenik kulture na području općine: iz prahistorije, srednjeg vijeka, predosmanskog i osmanskog razdoblja, perioda Austrougarske, Drugog svjetskog rata i rata za Bosnu i Hercegovinu 1992. – 1995. U toku 2002. godine na nivou Bosne i Hercegovine konstituisana je Komisija za očuvanje nacionalnih spomenika, koja je na području gračaničke općine nacionalnim spomenicima proglasila sljedeće objekte: Sahat kula, arheološko područje Korića Han u Gračanici, graditeljska cjelina – stari grad u Sokolu i graditeljska cjelina – stara džamja u Sokolu (Službeni glasnik Bosne i Hercegovine br. 33/02 i 32/03)

U izvještaju o radu Biroa za zapošljavanje Gračanica, koji je bio predmet rasprave na sjednici vijeća, izneseno je niz podataka koji ukazuju na dramatično stanje u oblasti zapošljavanja, što na najbolji način potvrđuje podatak da je kod nas trenutno mnogo više nezaposlenih nego zaposlenih lica. Krajem 2003. godine na području Tuzlanskog kantona bilo je 68.713 zaposlenih i 75.607 nezaposlenih, a na području općine 6.078 zaposlenih i 8.464 nezaposlenih.

15. 4. 2004.

GRAČANIČKI PERADARI MASOVNO GUŠE PILIĆE:

Pogubnom politikom u oblasti poljoprivrede i spoljnotrgovinskih odnosa aktuelna vlast odvela je domaću proizvodnju hrane u propast, upozorava načelnik Općine Gračanica Nusret Helić. Hičkokovske scene gušenja i spaljivanja jednodnevnih pilica te drugi prizori uništavanja hrane koje snimaju kamere i koje gledamo u večernjim dnevnicima domaće televizije ili čitamo u štampi, navodi se u saopćenju Helićevog kabineta, više od svega govore o nebrizi, neradu, nestručnosti i nekompetentnosti mnogobrojnih odgovornih osoba, vlada, ministarstava, predsjednika, dopredsjednika, poslanika i inih prodavaca magle i dima u ovoj napaćenoj zemlji. U saopćenju se upozorava da samo na području općine Gračanica od peradarstva živi između četiri i pet hiljada stanovnika čija egzistencija dolazi u pitanje, a golema uložena sredstva i oprema na vlastitoj zemlji propadaju. Načelnik Helić poziva odgovorne osobe, ministre poljoprivrede kantona i Federacije da hitno podnesu ostavke

18. 4. 2004.

ODBOJKAŠICE ŽENSKOG ODBOJKAŠKOG KLUBA "GRAČANICA" PLASIRALE SE U PREMIJER ODBOJKAŠKU LIGU BIH, NAJVEĆI USPJEH ŽENSKOG SPORTA U HISTORIJ GRAČANICE

Pobjedom nad ekipom "Ljubuškog" mlade Gračanke osvojile su naslov prvaka Dru-



ge odbojkaške lige Bosne i Hercegovine i plasirale se u najviši rang takmičenja u ovom sportu na nivou zemlje. Za ovaj veliki sportski uspjeh zaslužne su prije svega članice Kluba na čelu sa svojim trenerom magistrom Muhidinom Halilovićem, kao i svi oni koji su ih podržavali na putu do šampionske titule. Za najbolji ženski sportski kolektiv na općini gračaničke odbojkašice proglašene su u 2001. , 2002. i 2003. godini.

28. 4. 2004.

**43. SJEDNICA OPĆINSKOG VIJEĆA
GRAČANICA: POZITIVNA OCJENA PRIVREDNIH
KRETANJA NA OPĆINI U 2003.**

Broj privrednih subjekata povećan za 3%, ukupni prihod za 19 % i zaposlenost za 4 %. Potitivno je ocijenjen rad Udruženja poljo-

privrednih inženjera i tehničara u 2003. godini i javnih preduzeća “Komus” i “Vodovod i kanalizacija” u 2003. godini

28. 4. 2004.

**OKRUGLI STO: “KAKO DO KVALITETNIJEG
VODOSNABDIJEVANJA OPĆINE GRAČANICA”**

Organizatori Okruglog stola bili su Općinski načelnik, Javno preduzeće “Vodovod i kanalizacija” i Mjesna zajednica Gračanica. U radu skupa učestvovali su istaknuti stručnjaci iz oblasti geologije, hidrologije i hidrogradnje iz Tuzle i Sarajeva, predstavnici gračaničkog “Vodovoda”, općine itd. Materijali sa ovog Okruglog stola (od kojih većinu objavljujemo u ovom broju Časopisa u rubrici “Zavičaj”), bit će dobra osnova za buduće planiranje vodosnabdijevanja općine Gračanica u narednom periodu.